

राज्यं न पितरो यशस्कीर्तिं य एवं एतामाहुतिं हुत्वाहवनीयमुप-  
स्थाय दीक्षते क्षत्रियः सन् ॥ २३ ॥

अथामेयो वै देवतयाक्षत्रियो दीक्षितो भवति गायत्रश्छंदसा  
त्रिवृत्स्तोमेन ब्राम्हणो बंधुना. स होदवस्यन्नेव क्षत्रियतामभ्युपैति.  
तस्य होदवस्यतो ऽग्निरेव तेज आदत्ते गायत्री वीर्यं त्रिवृत्स्तोम  
आयुर्ब्राह्मणा ब्रह्म यशस्कीर्तिमन्यो वा अयमस्मद्भवति. क्षत्रं वा अयं  
भवति क्षत्रं वा अयमुपावर्तत इति वदंतः सो ऽनुबन्ध्यायै समिष्टय-  
जुषामुपरिष्ठाद् हुत्वाहुतिमाहवनीयमुपतिष्ठेत; नामदेवताया एमि न  
गायत्र्याश्छंदसो न त्रिवृतःस्तोमान्न ब्रह्मणो बंधोर्मा मे ऽग्निस्तेज  
आदित मा गायत्री वीर्यं मा त्रिवृत्स्तोम आयुर्मा ब्राह्मणा यशस्कीर्ति.  
स ह तेजसा वीर्येणायुषा ब्रह्मणा यशसा कीर्त्येद्रं देवतामुपैमि त्रिष्टु-  
भं छंदः पंचदशं स्तोमं सोमं राजानं क्षत्रं प्रपद्ये क्षत्रियो भवामि.  
देवाः पितरः पितरो देवा यो ऽस्मि स सन्यजे स्वं म इदमिष्टं स्वं पूर्तं  
स्वं श्रान्तं स्वं हुतं तस्य मे यमग्निरुपद्रष्टायं वायुरुपश्रोतासावादित्यो  
ऽनुख्यातेदमहं य एवास्मि सो ऽस्मीति तस्य ह नाग्निस्तेज आदत्ते  
न गायत्री वीर्यं न त्रिवृत्स्तोम आयुर्ब्राह्मणा ब्रह्म यशस्कीर्ति य एव-  
मेतामाहुतिं हुत्वाहवनीयमुपस्थायोदवस्यति क्षत्रियः सन् ॥ २४ ॥

अथातो दीक्षाया आवेदनस्यैव तदाहुर्यद् ब्राम्हणस्य दीक्षितस्य  
ब्राम्हणो दीक्षिष्टेति दीक्षामावेदयन्ति कथं क्षत्रियस्य आवेदयेदिति  
यथैवैतद् ब्राम्हणस्य दीक्षितस्य ब्राम्हणो दीक्षिष्टेति दीक्षामावेदयं-  
त्येवमेवैतत्क्षत्रियस्यावेदयेत्पुरोहितस्यार्षेयेणेति तत्तदिती ३ निधाय  
वा एष स्वान्यायुधानि ब्रह्मण एवायुधैर्ब्रह्मणो रूपेण ब्रह्म भूत्वा  
यज्ञमुपावर्तत. तस्मात्तस्य पुरोहितस्यार्षेयेण दीक्षामावेदयेयुः पुरो-  
हितस्यार्षेयेण प्रवरं प्रवृणीरन् ॥ २५ ॥